

Gbouŋ nba ki Pɔɔl din sɔb ki tur EFESUS TEEB nae na

Ki j̄in Efesus teeb gbouŋ na po

Pɔɔl gbouŋ nba ki u din sɔb tur Efesus doo ni niib na, u sinsinn barjar tee “Yennu lor nba ki u yaa wun lakin taan naauŋ kure, linba be sanpaapo nan tingbouŋ na ni, ki Yiisa-ii tee yudaano.” (1.10)

¹ Min Pɔɔl nba ki Yennu gannin a n teen Yiisa Masia toonii na foont Yiisa Masiaweira nba teeno yada ki be Efesus doo ni na.

² Ti Baa Yennu nan ti Yomdaano Yiisa Masia ninkpabaun nan parmaasir-ii be nani.

Yennu Seyeen nba sommitit Masia paak bianjinba

³ Naant ki ti tur Yennu, wunba tee ti Yomdaano Yiisa Masia Baa na niipoouk man, kimaan taa be Yiisa Masia ni na paak ki ɲoo Yennu turit Seyeen piinii kur nba be sanpaapo. ⁴ Yennu nba poŋ daa din ki nan tingbouŋ yoo nba naewa, ki u gannit a tii tee u niib, Yiisa Masia paak, kii tee popeendamm ki daa moƙ biit u boori.

⁵ Yennu loonit. Li paak, u loomm nan u lora ni, u poŋ din dukinewa a Yiisa Masia nie ki u saa teenit u waas. ⁶ Naant ki tin pak Yennu kimaan u ninbatinu nba yab bonchiann bianjinba, nan waa tint ninbaauk u Bilonkak paak na. ⁷ Kimaan Yennu nyik chab ti biit ki

nyinnit daabisin ni, u Bilonkak maŋ sɔn paake. ⁸ Gotir, Yennu ninbatinu nba be ti paak ki ki mɔk bikinu bianjinba.

Yennu nba mɔk yan nan bannu bonchiann bianjinba na, ki u tun waa dukin bianjinba ⁹ ki fiit wannit woonin ni lora nba ki u din senn a wun tan tun Masia ni na. ¹⁰ Yoo maŋ-i taŋi jaŋ, u ji saa tun gbenn u lora maŋ, ki lakin u naamii kur nba be sanpaapo nan tiŋ ni, ki Masia-ii tee yudaanɔ.

¹¹ Yennu tuun siar kur u dudukit nan u lora nie, ki gannit a tii tee u niib, nan u bibikit nba tee bianjinba pinpiik niwa na. ¹² Timm nba dɔŋ mɔk dindann Masia ni na, tii piak Yennu kii dontir u sann man.

¹³ Naan yimme mun din gbat tinnu barnanii nba tee barmonii maŋ ki teen Yiisa Masiaweira. Yaa teen Masia yada na paak, ki Yennu jii u Seyeen nba tee u yent dɔk na ki turi, nan waa din lor bianjinba na. ¹⁴ Nanne tee siara nan ti tan saa la yiar Yennu boor, ki bia want nan u saa tur u niib yent-n-mɔŋ nan barmonii. Tii piako kii dontir u sann man.

Ki jiin Pɔɔl Yenmiaru po

¹⁵ Li paak, yoo nba ki n din gbat yaa teen ti Yomdaanɔ Yiisa yada, nan yaa loon Yennu niib bianjinba na nan dinna, ¹⁶ n teen Yennu niipoouk i paak ki ki nyikit. N tun tian i poe, n miaru ni, ¹⁷ ki lek mei ti Baa Yennu maŋ, wunba tee paŋ daanɔ, ki bia tee ti Yomdaanɔ Yiisa Masia Yennu, a wun turi Seyeen nba saa turi yan ki fiit Yennu wanni, ki yin ŋamm bannɔ. ¹⁸ N bia meio maa wun yent i numpo, ki yin bann dindann

nba paak ki u yiini na, ki bia bann nan bona nba ki u tan saa tur u niib na njan bonchiann, ¹⁹ ki bia bann u paŋ nba yab bianjinba ki saa somm timm nba teeno yada na. ²⁰ U panchion maŋe ki u din jii ki fiin Masia kuun ni ki kaano Yendoun ni u niidiitu po na. ²¹ Masia-e yen sanpaapo yent damm, nan yiikoo damm, nan paŋ damm, nan yomdamm kur; njooe mok sann nba gar yiikoo kur sana nba be durinya na ni nan durinya nba baat na ni. ²² Yennu jii bonsiar kur ki teen Masia nuu nie. U jii njooe a wuu tee njo Yennu nigannkab kura Yomdaano. ²³ U nigannkab maŋe tee u gbanant, ki u gbanant maŋ gbee nan u paŋ, ki u mun gbee nan Yennu paŋ.

2

Kuun nan manfoor labaar

¹ Yoo nba din gar na, i moyetuk nan biit tumu paak, ki li tee nan i kpoe na. ² I din waa tingboun na biit sonue, ki sak Sintanii nba dia narinbiit nba bi sanpaapo, nan niib nba ki saak Yennu mob na. ³ Barmonii, ti kura mun din naan nan li nibooru nae, ki waa ti gbanant nion, ki tuun ti gbanant nan ti dudukit loomm. Timm nan njam toona din baat nan Yennu wutoore ti kura paak.

⁴ Naan Yennu lomm nan u ninbatinu yab bonchiann ki kaa bikinu, ⁵ li paak, taa din yet Yennu mob, ki li tee nan ti kpoe na yoo nba, li yooe, ki u nyinnit kuun ni, ki konit manfoor ni, Masia paak; Yennu ninbatinu paak ki i tinn. ⁶ Taa

be Yiisa Masia ni na paake ki Yennu din lakin fiin timm nan ɲoo, ki ti lakin dii naan nano Yendoun ni. ⁷ U din tun linba na a wun wann soo kura u ninbatinu nba yab bianjinbae, ki tun burchint turit, Yiisa Masia paak. ⁸ Yennu ninbatinu na paake ki i tinn, kimaan yaa teen Masia yada na. ⁹ Soo kan fit nyu bara li paaki, kimaan li ki tee u tiɔɲ toona paak kaa; li tee Yennu piiniie. ¹⁰ Yiisa Masia nie ki Yennu teent taa tee binba, ki turit toonɲana tumu binben, a tii tuun linba ki u din poɲ lor a ti tun na.

Masiaweira kur tee yomme u ni

¹¹ Yimm nba ki tee Juu teeb na, Juu teeb yi yimm ɲarin punjoote, ɲaan yi bi moɲ sankpana; ii tian man yaa din tee nibooru nba yoo nba gar na. ¹² I din ki mi Masia li yoo. I din tee saamme, ki bi ki kaani ki pukint Yennu nigannkab ni. I din be tingbouɲ na ni ki ki mi Yennu, ki bia ki moƙ dindann, kimaan waa din tur u niib moƙsona nba, i din ki pukin li ni; ¹³ ɲaan motana i ji be Yiisa Masia nie, li paak, yimm nba tuu be banfoƙira na ji nyat nakinɔe, u kuun paak, ¹⁴ kimaan ɲooe taan Juu teeb nan binba ki tee Juu teeb ki teemm nibooryenn, ki parmaasir baar; waa kpo na paak, ki u biir dataar nba din tuu be bi sinsuuk ni na. ¹⁵ U din kpeen Juu teeb sennu nan li koot na kura, a wun te parmaasir n baar nibooru munlee maɲ sinsuuk ni, ki bii be u ni, ki taan kii tee nipaamm booryeɲ. ¹⁶ U dapunpunn paak kuun maɲ te ki u biir dataar maɲ bi sinsuuk ni, ki jiiɓ ki taamm booru yennkoɔ, ki jen namm Yennu boor. ¹⁷ Li paak, Masia din baar moont

parmaasir barnanii moontii ki tur yimm nba ki tee Juu teeb, ki din fok nan Yennu na, ki bia baar nann ki tur Juu teeb nba kpiaw na. ¹⁸ Masia paake ki Juu teeb nan binba ki tee Juu teeb na kura fit baar ti Baa Yennu man boor, u Seyeen yenokoo ni.

¹⁹ Motana, yimm nba ki tee Juu teeb nan Yennu niib na tee tinyenkoo waase, ki ji tee Yennu naateeb; i ji ki tee saamm kaa. ²⁰ Fiakir yennkoo nba ki sokiniinba nan toomiinba din fokin na paake ki bi mun toon, ki Yiisa Masia mon tee li tanjaann. ²¹ Njooe dia Yennu niib man ki bi be fanu ki kpaatir ti Yomdaano boor. ²² Yimm nan njoo nba taan na paak, ki yimm nan nam mun bia taan teen diiuk nba tee Yennu yar, ki u Seyeen be li ni na.

3

Pool nba tuun ki teen binba ki tee Juu teeb bianinba

¹ Linba na paake, ki min Pool nba koo dansarik Yiisa Masia toona paak na lek mei Yennu, yimm nba ki tee Juu teeb na paak. ² N ki biris nan i pon gbat nan Yennu turin toona na, i sommir paaki. ³ U din fiit u woonin ni lor na ki wannima. ⁴ (I-i karin maa din sob linba waaminna na, i saa bann nan n set mi siar ki jiin Masia po.) ⁵ Motana, Yennu ji naan ki u Seyeen fiit u woonin ni lor na ki wann u toomiinba nan u sokiniinba nba ki u gannib na, naan li din ki tee nna kaa sianyoo. ⁶ U woonin ni lor man tee nnae: barnanii man paak ki binba ki tee Juu teeb na ji fit taan ki la

yar Yendouŋ ni nan Juu teeb; ki bia taan namm ki tee gbananyennkoo ki fit mok waa din senn moosonn nba Yiisa Masia ni na.

⁷ Yennu ninbatinu paak ki u din turin yaak a n teen u toonii kii moontir u barŋanii, nan waa turin paŋ bianŋinba na. ⁸ Yennu niib sinsuuk ni, mine tan joont ki ki tee siar, ŋaan Yennu tur mine yaak a man jii barŋanii nba wantit Masia nba sii teen binba ki tee Juu teeb na bonŋana bonchiann bianŋinba, ⁹ ki bia te ki niib kur nunii n yent, ki bin bann bianŋinba ki Yennu woonin ni lor maŋ tuun ki gbeent Masia ni. Yaayoo niewa ki Yennu nba nan bonsiar kur na din diar woonin ni, ¹⁰ a Masiaweira paak, malakanba ni yent damm, nan Yendouŋ ni yiikoo damm n tumii motana u subinbooru booru na. ¹¹ Ti Yomdaano Yiisa Masia nie ki u din tun linba na, nan waa lor bianŋinba na. ¹² Taa teen Masia yada ki be u ni na paake, ki ti mok yuugontir ki saa baar Yennu boor nan parcheenn. ¹³ Li paak, n barimie, i daa te ki i para biir nan maa di biak i paak na, kimaan li tee i sommir paake.

Masia lomm labaar

¹⁴ Linba na paak ki n gbaa n duna paak ti Baa Yennu toonn, ¹⁵ wunba yaa boor ki Yendouŋ ni nan tingbouŋ na ni maaru kur gaan bi sann. ¹⁶ Yennu paŋ nba yab bonchiann bianŋinba na, n meio a wun turi paŋ maŋ u Seyeen paak, ki paŋ maŋ-ii be i ni. ¹⁷ N bia meio a Masia n jii i para ki teen u binbeboor, i yada paak, ki meio a wun te ki yin fit set chib, ki baa jiina ki fokin fiakir, ki lomm na-ii paar, ¹⁸ ki yimm nan Yennu niib kur n fit bann Masia lomm yarimu, nan li fokint,

nan li sumiiu nba tee bianjinba, ¹⁹ ki bann Masia lomm nba gar siar kur, ki i benu-ii tee nan Yennu benu na.

²⁰ Yennu paŋ nba tuun ti ni na paak, u saa fit tun bonsiar kur ki turit ki gar taa dukii linba ki meio. ²¹ Nɔɔ Yennu tan saa la baakir Yiisa Masia nan u weira paak, yoo kur, yaayoo siiyoo. Mamɔmm.

4

Yiisaweira mɔtaauk labaar

¹ Min nba kɔɔ dansarik ti Yomdaano toona paak na, n kpaanie a yin ŋaan ki i binben-ii tee fanu nan Yennu nba loon ki lii tee bianjinba na. ² Ii sikint i mɔŋ, kii be soon nna nan sukuru, kii mɔk yandinjir nan i leeb, nan lomm. ³ Yennu Seyeen nba teeni mɔtaauk nba na, ii yabir i mɔŋ kii diar nan parmaasir nba taani na. ⁴⁻⁵ Masiaweira tee gbananyenne, ki Yennu Seyeen yenokɔɔe be, ki Yennu tinni ki turi dindann yennkɔɔ. Yomdaan-yenokɔɔe be, ki ti taan ki teenɔ yada, ki Yennu nyunwuru mun tee yennkɔɔ. ⁶ Yennu tee yenokɔɔe ki tee nisaarii kura Baa, ki bia tee sɔɔ kura Yomdaano nba tuun siar kur, ki bia be siar kur ni.

⁷ Masia nba turit linba na, ti kura gaar piinganjire, ⁸ nan laa poŋ sɔb Yennu gbouŋ ni bianjinba na a:

“Waa din doo sanpaapo yoo nba,
ki u nyinn yommii ki ŋaab yann, ki tur nisaarii
piinii.”

9 Tɔn, “U din doo sanpaapo” paak tee bee? Li want nan sinsinn u din sik tingbouŋ na nie.*
 10 Njoo nba din sik tingbouŋ na ni maŋe bia doo sanpanaagbeŋ a wun gbee yent durinya na. 11 Njooe tur nisaarii u toona na: U gann siab ki teemm toomiinba, ki leeb tee sokiniinba, ki yemm mun tee barŋanii moont-teeb, ki siab mun tee njoo Masiaweira diara, ki siab mun tee wannteeb. 12 U tun linba na a binba tee Yennu niib na kura n fit jaŋ nan u toona maŋe, ki chee njoo Masiaweira para. 13 Li paak, taa teen Yennu Bija yada ki banno na, ti saa taan yomme kii tee niib nba binbeŋ ŋan, ki tee nan njoo Masia yar na. 14 Ti ji kii tee waas kaa, ki nibiit nan kpinkpannii damm sii diat laŋ, nan baa tee nilee bianjinba na. 15 Njaan ti sii piak barmoniie nan lomm, kii nob kii pukii, ki Masia tee ti yudaano. 16 Njooe te ki gbanant boka kur dia bi leeb, ki gbanant maŋ tukita dia nan leer; li kura-i tuun nan leeb chib chib, gbanant maŋ sii nobe.

Binbenpaanɔ labaar

17 Ti Yomdaano sann paak, n kpaanie, i ji daa be nan binba ki mi Yennu, ki bi dudukit be bunbonn ni, ki ki mok nyoot na. 18 Bi tee tubkangbatae ki ki bant siari, li paak, bi ki pukin Yennu nba tur manfopaann nba na ni. 19 Bi ki tiin fei, ki lin tuun jakint toona, ki ki dia bi moŋ nan waaminawa.

20 Njaan yimm din ki tumii ŋann kaa Masia boori. 21 I din gbat u po, ki teen u weirae, ki bi bia

* 4:9 4.9 Tingbouŋ, koo tinpɔɔr ni.

wanni barmonii nba be u niwa. ²² Li paak, yabit i mon man ki nyann i binbenkperik nion nba tuu biiri na. ²³ Naant ki i dudukit nan i para n namm pant, ²⁴ kii dia binbenpaan nba ki Yennu turi na, kii naan Yennu, kii be fanu, kii tee popeendamm nan barmonii.

²⁵ Li paak, ii nyik faak, naan soo kur-ii piak barmonii kii teen u loo, kimaan ti tee niyenokooe Masia ni. ²⁶ Li-i tee ki a donn wutoor naan faa daa tuun toonbiiti, ki bia daa diar a par ni ki yonnu baa, ²⁷ ki daa teen Sintaanii yaaki. ²⁸ Wunba tuu jaan u leeb bont na, wun ji nyik jamu, naan yabir tun toona ki dinn u mon, ki bia fit tur tatimm linba ki bi loon. ²⁹ I daa piak monbonbiit ki teen i leebi, naan te ki i mononaii tee linba kpaa talas ki mok nyoot, ki i leeb-i gbat, lin pukimm binben nba nan. ³⁰ I daa tuun linba saa te ki Yennu Seyeen n la parbiiri. Nooe tee Yennu dok nba want nan Daar baate ki Yennu tan saa turi yent-n-mon setik nan monii. ³¹ Ii nyik tonu binben kur, ki daa mok wutoori. Soo ji daa mok kunkochiok nan u loo, soo daa sukii u loo, ki bia nyik nan dudukit kur. ³² Ii tee burchimm nan ninkpabaun damm man i leeb boor. Ii nyikit leeb biit kii chabitib, nan Yennu nba nyikit i yara ki chabiti bianinba, Masia paak na.

5

Ki jiiin yentu ni benu po

¹ Yaa tee Yennu walonkai na, ii yabir i mon kii tee nan non na, ² ki naan ki lomm-ii dia-i, nan Masia nba din loont bonchiann, ki gaar ti paak ki kpo, ki teen marun nba ki Yennu loon na.

³ Yaa tee Yennu waas na paak, li pon ki nan bonchonchonsin, koo jakint toona, koo nianchiõᅇ toona-ii be i sinsuuk ni. ⁴ Ii teen Yennu niipoouk yoo kura, ᅇaan daa te ki bonchonchonsin barii koo jakint barii koo baryana nyi i mõi ni. ⁵ Li nan yii mi nan wunba tee bonchonchon koo joonbaaruk koo jakint daano koo nianchiõᅇ daano, ᅇõõe kan la yiar Masia nan Yennu naan ni; nianchiõᅇ tee nan patmannu nae.

⁶ Li toonbiit tumu paake te ki Yennu wutoor baat moyêtdamm paak. I daa te ki soõ n jii u jat wannu ki kpannini. ⁷ Ii bokit i mõᅇ, ᅇaan nyik li damm. ⁸ I ji tee Yennu waase, ki be yentu ni; i ki be bunbõnn ni kaa, nan yaa din tuu be na; li nan ki yii tee yentu na waas, ⁹ kimaan linba tee barmõnii nan yentinu nan toonᅇana kura tee yentu yare. ¹⁰ Li paak, ii yabir i mõᅇ ki tumii linba saa penn ti Yomdaano par, ¹¹ ki daa tokii binba tuun bunbõnn ni toona ki nyõõt kaa li ni na, ᅇaan te ki bi bunbõnn ni toona maᅇ n kõõ yentu ni. ¹² Linba ki bi tuun bunbõnn ni na mõk fei bonchiann nan tii piak li po gbaa. ¹³ Naan baa tan saa nyinn bonsiar kur yeenin ni yoo nba, bi bunbõnn ni binbeᅇ maᅇ kura saa fiite perrr. ¹⁴ Kimaan linba kur ki bi fiit li gbina, li ji tuu dõõ yeenin nie. Li paake ki li din soõ Yennu gbouᅇ ni a:

“Fin nba goõnt, fan fiir goõn ni, ki fiir kuun ni, ki Masia saa tura u yentu.”

¹⁵ Li paak, ii mi man yaa be bianᅇinba, ki daa be jatbenu, ᅇaan kii tee subindamm. ¹⁶ Ii jii i yoo kii tuun fanu, kimaan yoo na tee yobiiuko.

¹⁷ Li paak, ii bant linba tee ti Yomdaano loomm, ki daa tee i mɔŋ jatiti.

¹⁸ Ii daa nyu daan ki yibi; ŋann saa biirie, ŋaan ii yabir i mɔŋ paak kii gbee nan Yennu Seyeen.

¹⁹ Ii yiin yanii, nan Yennu gbouŋ ni yanii, nan Seyeen yanii kii teen i leeb, kii piak ti Yomdaano nan i para kur. ²⁰ Yoo kur, ii teen ti Baa Yennu niipoouk bonsiar kur paak, ti Yomdaano Yiisa Masia sann ni.

Poob nan bi sɔrib labaar

²¹ Masia paak, ii sikin i mɔŋ ki tur i leeb man.

²² Poob, yaa baakit Masia bianjinba na, ii saak i sɔrib mɔi nna, ²³ kimaan Masia nba mɔk yiikoo u niib paak bianjinba na, nnae ki joo mun mɔk yiikoo u poo paak. Masiaweira tee u gbanante, ki u tee bi Tinntɔɔ. ²⁴ Poob mun-ii saak bi sɔrib mɔi bont kura ni, nan Masiaweira nba saako bianjinba na.

²⁵ Jab, ii loon i poob nan Masia nba loon u niib ki gaar bi paak ki kpo bianjinba na. ²⁶ U din tun linba na, ki bia jii Yennu barii nan nyun ki wurib, a wun ŋammib fanu ²⁷ ki jiin teemm u mɔŋ nuu ni nan fant, ki bi fant na daa mɔk dansiari, kii biaki tee popeendamm, ki daa mɔk biit nan waama. ²⁸ Joo nba loon u poo, u loon u mɔŋe. Li paak, li ŋan ki jab-ii loon bi poob nan baa loon bi mɔŋ gbanant bianjinba na. ²⁹ (Soo ki mi yêt u mɔŋ gbananti; soo kura gorii u gbanante fanu ki dint u mɔŋ, nan Masia nba tuun bianjinba teen u niib na. ³⁰ Timme tee u gbanant maŋ.)

³¹ Yennu gbouŋ yet nnae a, “Li paak, ki joo saa nyik u baa nan u naa, ŋaan koon u poo, ki bi niib

banlee n taan ki tee gbananyennkoo.” ³² Yennu mōmaan na sumii bonchiann, ŋaan min mi nan li want Masia nan u niib poe. ³³ Ŋaan li bia want yimme a li ŋan ki joo kura-ii loon u poo nan waa loon u moŋ bianjinba na, ki poo kur-ii munii baakit u soro.

6

Waas nan bi damm labaar

¹ Waas, ii saak i damm moi ti Yomdaano Masia paak, kimaan ŋanne took nan yin tun. ² Sennu nba ki Yennu moŋsonn pukin li paak sinsinn na tee a, “Turin a baa nan a naa baakir, ³ ki a bont kur n somm fanu, ki a manfoor n bia fokit tingbouŋ na ni.”

⁴ Baanba, i daa dia i waas diabiuk ki dont bi wutoa, ŋaan kii wantib kii kpaamm ti Yomdaano nba loon bianjinba.

Daaba nan bi chanbaanba labaar

⁵ Ton, yimm nba tee daaba na-ii munii saak i chanbaanba moi, kii tiimm janmaanii, kii tuun toonn kii teemm nan i para kura, nan yaa bo sii tuun ki teen Masia bianjinba na. ⁶ I daa tuun ki teemm yoo nba ki bi gorii-i na kuukoo kaa, a bin paki. Yaa tee Masia daaba na, ii jii i moŋ kii tuun linba tee Yennu loomm nan i para kura. ⁷ Ii tuun i toona nan parpeenn, ki lii want nan i tuun ki teen ti Yomdaano Masia-e, ŋaan daa dukii nan i tuun teen nisaarika, ⁸ kii tian nan ti Yomdaano tan saa tur wunba yen u moŋ nan daabir kura bi toonjana paauko.

⁹ Chanbaanba, ii muni dia i daaba bonŋann ki daa diab nan ninmoŋni, kii biaki tian nan

yimm nan i daaba maŋ kur taan mək Yomdaano yenəkooe Yendouŋ ni, ki u ki mək lukitimi.

Yennu naagbankəŋir labaar

¹⁰ Linba joont tee nnae, ii chee i para ti Yomdaano ni, kii mək yabint paŋ nba ki u turi na. ¹¹ Ii jii Yennu naagbankəŋir na ki lia, ki lin te yin fit nyann Sintaanii lorbiiuk na. ¹² Kimaan ti ki kən nan nisaarii kaa, ŋaan ti kən nan narinbiit kure nan bi yikoo damm, nan motana durinya bunbənn ni yudamm, nan sanpagbouŋ ni narinbiit. ¹³ Li paak, ii jii Yennu naagbankəŋir na ki lia, ki fit kən dabiir nba tan saa baar maŋ ni, ki daa nyikiti, ki li poorpo ki i bia see chib.

¹⁴ Ii set man, ki jii baronii ki bobin i sai ni, kii mək yentinu nba tee nan naagbankəŋir na, ¹⁵ ki teen siir kii məontir baranii nba teen niib parmaasir ki tee nan taasaat na. ¹⁶ Linba pukin na paak tee, ii jii yada nba tee nan naagbankəŋir nba ki i saa fit kpeen Sintaanii peenii nba mək muu na, ¹⁷ ki dia i tinnu nba tee nan kut fokirik na, ki bia dia Yennu barii nba tee nan jukbanjiak nba ki u Seyeen tuun nann na. ¹⁸ Ii mei Yennu yoo kur nan ninmənn, u Seyeen nba sommiti bianinba na; ki chekin i məŋ nan gbankur ki pukin Yenmiaruru kii teen Masiaweira kura, ¹⁹ ki bia miar Yennu ki tur ŋ mun ki man fit la sənu ki pak nan parcheenn, ki mən woonin ni baranii na, ²⁰ kimaan li paake ki n tee toonii ki be dansarik ni. Ii mei Yennu kii teenin ki man mən baranii maŋ nan parcheenn, nan laa kpaa talas nan man pak bianinba na.

Foontjoontii

²¹ Motana ti naa bilonkak Tikikus, wunba tee ti Yomdaano toontunno nan barmonii na saa beti maa be bianjinba, nan linba ki n tuun. ²² Li paake ki n tuumo i boor, maa wun turi labaar ki yin bann taa be bianjinba, ki bia chekini.

²³ Ti Baa Yennu nan ti Yomdaano Yiisa Masia n tur yimm Masiaweira kur parmaasir, nan lomm, nan yada. ²⁴ Yennu ninkpabaun-ii be nan binba kur loon ti Yomdaano Yiisa Masia na nan lomm nba kaa gbennu.

Yennu Gbouj Moor
Bimoba: Yennu Gbouj Moor Bible

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 29 Sep 2022 from source
files dated 11 Jul 2022

00d89ba0-4677-52d9-9bc5-aa3d7c5c966d